



65

60

55

門 4 13  
號 565  
卷 8

宸垣識畧卷五

天和吳長元太初氏輯

內城一

長元按原書城市一門依明代五城編列坊巷次序不甚參錯舊聞考據

本朝定制合內外城通分五城固典制攸關而于游覽之例方位不能整齊矣今考內城所編八旗居址界限甚清且環拱星羅法制綦重因據以編次先錄各旗界址于前而以官署寺觀實之並繪圖

于卷首庶觀者瞭如指掌第旗制上三下五故自

北而南地志前朝後市應自南而北為稍異耳

制以鑲黃正黃正白為上三旗居址  
方位以色相勝故三旗自北而南

街制自南以至北謂之經自東以至西謂之緯大街二

十四步濶小街十二步濶三百八十四火巷二十九

街通街通二字本方言

長街干步廊街丁字街十字街鐘樓街半邊街碁盤

街五門街三义街此皆元時街名

長元按今日碁盤街東西長安街王府大街崇文

街東大市街南小街北小街安定門街鼓樓東大

街鼓樓西斜街舊鼓樓街德勝門街宣武街新街

西大市街錦石坊街北小街舊刑部街干石橋斜

街皆內城之著者

京師人呼巷為衚衕世以為俗字不知山海經已有之

勞水多飛魚食之已痔衕注音洞獨衕字未經見

補按衕衕二字元人有以此入詩者衕字載在說

文收于廣韻兼平去二音初非俗字

今從省文作胡同

正藍旗滿洲蒙古漢軍三旗與鑲白旗接界之處係自

單牌樓至崇文門由金水橋向東至大城根滿洲官  
 兵自鑲白旗接畧處由長安街牌樓向西進東長安  
 門至金水橋為頭叅領之十六佐領居址自新街南  
 口至北口為二叅領之十七佐領居址自宗人府向  
 南戶部週圍至中玉河橋為三叅領之十七佐領居  
 址自中玉河橋至洪廠胡同北口為四叅領之十七  
 佐領居址自原缺胡同向北至長安街牌樓為五叅  
 領之十七佐領居址蒙古官兵自單牌樓至崇文門  
 為頭叅領之十五佐領居址自江米巷東口至原缺

胡同為二叅領之十四佐領居址漢軍官兵自單牌  
 樓觀音寺胡同向東至舉場西門為頭叅領之六佐  
 領居址自羊肉胡同西口向東至水磨胡同為二叅  
 領之七佐領居址自襪褙胡同西口至東口為三叅  
 領之五佐領居址自蘇州胡同西口向東至馬皮廠  
 北口為四叅領之六佐領居址自船廠胡同西口向  
 東至馬皮廠南口為五叅領之七佐領居址  
 南曰正陽門俗稱前門元名麗正明正統間改今名  
 本朝因之

明刑部右侍郎孟兆祥崇禎甲申三月守正陽門賊至死于門下 本朝賜諡忠靖子進士章明妻何氏婦王氏俱自縊

棋盤街在正陽門內 大清門之前周繞以石闌四圍列肆長廊百貨雲集又名千步廊

長元按元歐陽原功詩麗正門當千步街則千步廊爲闔闔之所明矣今 大清門外居人猶仍此名舊聞考以門內朝房當之蓋據金志而言

敷文坊在棋盤街東爲東江米巷西口

宗人府署在闕東沿 大清門紅牆迤北西向有

世宗御書堂額曰敦崇孝弟署後有明碑二有 玉牒庫黃檔庫銀庫

吏部署在闕東宗人府之南西向

世宗御書堂額曰公正持衡後堂有明碑二

明吳寬手植藤花今在穿堂之右屋三楹曰藤花廳乃吏部長官治事之所

明吳寬詩手種朱藤已七年長條綠架每相纏只看葉密清陰覆忽報花多紫粉懸風下掉頭嫌一

老雨餘舒眼眄三賢從今堆字詩還和寫八當時  
草木篇

王士禎吏部藤花下詩日斜人吏散雜坐古藤陰  
時有涼風至冷然開我襟周行聊寄迹邱壑共論  
心尚憶延陵叟清徽感至今

湯右曾藤花廳花時偶作文書堆案眼從遮不記  
藤陰日又斜滿架丰茸綴纓絡兩株詰曲走龍蛇  
似聞西省新栽竹劉貢父事空憶東堂舊種花東坡六詩

七年來幾閒日風鑪雪乳一甌茶

又藤花廳花事將闌作一年容易及花時待到花  
開看校遲槐柳陰中春已老燕鶯聲外蝶先知綠  
雲片片將成幄紫玉條條尚綴枝三百年來遺事  
盡風流留得在曹司

左署古藤已不可見獨方輿邦撰記石刻尚存文選  
司庫後有萬歷二十年兵部職方司員外郎宣化蔣  
行可跋

許公祠在文選司許名直字若魯授文選主事考功  
員外郎崇禎甲申都城陷賦詩自縊 本朝賜諡忠

愍

水鏡堂明冢宰長洲陸公所建毛少宰澄爲之記今之南火房是也

戶部署在闕東吏部之南西向

世宗御書堂額曰九式經邦大庫在署東北

禮部署在闕東戶部之南西向

世宗御書堂額曰寅清贊化左爲鑄印局右爲韓昌黎祠視日儀刻石禮部寅清堂前

禮部儀制司有優鉢羅花開必四月八日至冬結實

如鬼蓮蓬脫去其衣中有金色佛一尊今無存

典樂禮部滿尚書兼之所屬有神樂和聲二署掌儀司鑾儀衛樂並隸焉

兵部署在闕東宗人府後東公生門直街西向

世宗御書堂額曰整肅中樞二堂照壁刊周禮大司馬法一則猶明代物

楊繼盛祠在武選司

王士禎武部拜椒山先生祠詩祖德靈長日孤臣報國年九原終不死兩疏到今傳異代還祠廟明

神儼豆籩關西二夫子家學仰前賢

工部署在闕東兵部之南西向

世宗御書堂額曰敬飭百工其長官視事之所亦曰藤花廳枝幹蝨與吏部相彷彿不傳爲何人所植節慎庫在署東有金銀元寶各一蓋鎮庫之物梯登其上其邊尚高于人上刻永樂九年字

鴻臚寺署在闕東工部之南西向

世宗御書堂額曰肅贊朝儀

本朝定制王公班于丹陛上一二品官列于丹陛三品以下各就班次東西面重行北上序以外國使臣則隨右班乾隆二年定制以吏戶禮翰詹等爲左班兵刑工都察院大理寺等爲右班十七年始以庶子講讀等向列三班者改四班中贊編檢等向列四班者改五班

明初序班執政大臣謂之擎天班玉堂清署謂之煥壁班言官法司謂之劔鐔班外戚謂之椒蘭班親王謂之瓊枝班功臣將帥謂之豹首班其餘朝臣謂之隨班



欽天監署在闕東鴻臚寺之南西向

世宗御書堂額曰奉時敬授

大醫院署在闕東欽天監之南西向堂內恭懸

聖祖御製賜院臣黃運詩

先醫廟在堂左南向供三皇聖像有

聖祖御書永濟羣生額左右廡列勾芒風后至王冰各配位廟外北向者爲藥王廟有銅人像蓋明英宗時所修者每春秋上甲日祀之

三皇廟內有鍼灸經石刻元元貞初製其碑之題篆則宋仁宗御書至元間汴汴移至此者今所存乃明時重摹上石

院署有古銅人虛中注水闕竅畢達古色蒼碧瑩潤射日相傳從海中湧出者按銅人像在藥王廟神像前作于宋天聖時元至元間修之明英宗時又修之海中湧出殆傳訛爾

元中統中尼波羅國人阿爾尼格從帝師入見帝問何所能對曰臣以心爲師頗知畫塑鑄金之藝帝命取明堂鍼灸銅像以示之曰此安撫王楫使宋時所

進歲久缺壞無能修完之者汝能新之乎對曰請試之至元二年新像成關高脉絡皆備金工嘆其天巧莫不愧服

太醫十三科曰大方脉雜醫科小方脉科風科產科眼科口齒兼咽喉科正骨兼金瘡科瘡腫科鍼灸科祝由科禁科循元醫學之舊也

怡賢親王祠在正陽門內東城根南玉河橋西面城墻南向雍正八年

勅建

庶常館在南玉河橋西有

御書芸館培英額後有樓以貯 賜書

○明上林苑監在東江米巷中玉河橋西

四夷館在東江米巷中玉河橋西

長元按今東城根庶常館東有高麗人所居館舍始卽四夷館之別宇

玉河橋在東城根者曰南玉河橋在東江米巷者曰中玉河橋在東長安街者曰北玉河橋水自皇城內南箭亭流出南穿城歸正陽橋城河玉河橋東西兩岸

俱植柳垂蔭水面

明王家屏玉河新柳詩水繞沙隄曲橋看御柳眠  
柔條輕着雨嫩葉暗抽烟影落澄波細陰垂畫檻  
偏亭亭依漢苑遲日待鶯遷

邱象隨玉河新柳詩九霄佳氣散春晴新柳千條  
拂禁城玉勒引絲初繫馬金梭織葉早藏鶯風飄  
河上垂垂綠烟鎖橋邊濯濯輕自是 聖朝多雨  
露一時林木盡含榮

詹事府署在玉河東岸西向係明代建 本朝康熙間

重加修葺

聖祖御書額曰德業仁義又 先師祠有

御書存誠二字碑

後堂側孔子廟前松二株甚是奇古主簿廳舊址得  
扁石曰一枝間王百穀書

京城井水多鹹苦不可飲惟詹事府井水最佳汲者  
甚衆

淳親王府在御河橋西岸

翰林院署在東長安街北玉河橋之西北向卽元之鴻

臚署也第三重爲登瀛門堂五楹西爲讀講廳東爲編檢廳左廊圍門內爲狀元廳右廊圍門內南向者爲昌黎祠北向者爲土穀祠堂之後爲穿堂左爲待詔廳右爲典簿廳後爲後堂南向中設

上臨幸時所御寶座御屏後堂東西屋爲藏書庫院內東偏有井覆以亭曰劉井西偏爲柯亭自後堂而南門內爲敬一亭自劉井而東爲清秘堂堂前爲瀛洲亭亭下方池爲鳳凰池池南爲寶善亭堂後爲成樂軒自柯亭而西爲先師祠祠南爲西齋房又

南爲原心亭有

聖祖御書堂額曰道德仁義乾隆八年

上以翰林院傾圮命加修葺九年十月工峻

御書稽古論思集賢清秘二額顏其堂又

賜古今圖書集成一部貯寶善亭詠曰

親幸送掌院大學士鄂爾泰張廷玉進院

賜宴賦詩又與諸臣聯栢梁體一篇凡籍翰林及改官

進秩者皆與凡百六十五人又

御製是日復得詩四首示諸臣皆恭勒院內

長元按是日翰苑諸臣恭和

御製元韻凡數百首玉堂 盛典千載一時不獨傳為

佳話已也

元時翰林院以金烏珠第為之其地在鳳池坊北鐘樓之西鐘樓又在中心閣西按中心閣址為今鼓樓

則元之翰林院在今鼓樓迤西歐陽楚公詩翰林老

屋勢深雄猶是金家元木宮是也

烏珠即元木譯音

鑿峯國史院庭中石名元時翰林諸老賦詩甚夥

析津志云南省北省乃金時二稅賦宰相之莊曰南

相莊北相莊據此則元之北省後改翰林院者為金

時北相莊烏珠亦稱北相可証

瀛洲道古錄元時無鴻臚寺官名但有侍儀司析津

志侍儀司署在都省之東水門之西南倉之前按都

省即元之中書省以尚書改設所謂南省也南倉即

元之大倉今以金水河水門按之元時署在其西今

則當其西北蓋明時展築南城水門遂徙而南而署

廨之縈帶玉河則自元迄今未改也

明嘉靖戊子始建御製五箴碑于敬一堂亭樹于堂

南左則劉文安井井之外為蓮池右則柯竹岩亭亭

之前為土山

劉文安名定之官學士柯竹岩名潛官學士

施閏章劉并詩青瑩誰鑿水晶寒錦石銀牀位置

安起草羣臣曾洗硯論文異代一憑闌宮雲近覆

晴猶潤海眼潛通旱未乾倘有泥蟠神物在那愁

霖雨被人難

又柯亭詩仙客聯翩倚檻來丹亭曾向日邊開殘

荷蔽芾猶連井芳草凄迷舊有臺接坐共憐星聚

地凌雲誰稱歲寒材風流未墜餘陳蹟悵望千春

首重回

柯潛既綜院章就詞林後圍結清風亭亭下鑿池時

蓮夾渠引泉公退偃坐其中翛然若真登瀛洲者又

有栢二株曰柯學士栢廖道南嘆曰流風遺澤令人

永矢勿諉

寶善亭軒牕虛豁旁臨玉河環蔭喬木學士大夫靜

觀之所

院中先師廟庭古桑尚存當卽李西涯所賦採桑

玉堂陰也

明李東陽詩采桑玉堂陰分蠶長安郭一勞累百  
枚再分連數箔寧知富貴地此物能沃若 采桑  
玉堂陰陰濃樹婆娑一采不滿筐竟日能幾何乃  
知富貴地不及窮山阿

第三廳史官之廳也又曰槐廳今翰林正廳之西偏  
史官所居是也

查嗣瑛瀛洲亭補種新槐詩天街三月雨如絲  
兔日纔分葉尚遲不是春風甘落後玉河新柳正參  
差 綠痕先上最高枝得地翻驚雨露私留待他

年鑽火候好分餘影當青藜

李鎧翰林院古槐歌深巖之地三廳旁古槐一株  
摩青蒼何人手植歲月久扶疎上動虛星芒銀花  
掩暎白日靜粉署窈窕高雲涼披襟其下落遠韻  
鼓柯振葉清且揚我聞博士舍前列數百雍容入  
市陳縹緗又聞南省深夜響絲竹往往詔拜中書  
堂今之古槐無乃是承華正德差可方嗚呼大造  
栽培亦偶爾有材難必登巖廊君不見路側紛紛  
蔭行旅翦伐不避纏風霜槐乎槐乎好自愛託根

得所須流芳

長元按乾隆癸巳年特開四庫全書館翰林院為  
辦理處 武英殿為繕寫處自 殿板館書外

詔徵天下遺書共一萬三千七百二十五種 內重複者三千七百

五十種 舊存明代永樂大典殘缺幾半

命詞臣分類纂出整書八十五種散片 古書殘缺者曰散片二百

八十四種分存書存目二項纂輯提要以該一書

大旨按期輪進書之佳者皆蒙

御製題詞以冠簡首其四部條目與前代稍異經部十

類曰易曰書曰詩曰禮曰春秋曰樂曰孝經曰四

書曰總經解曰小學易類別卜筮入子部術數禮

類別歷代儀注入史部故事樂類別宮調絲竹譜

小學類別八法俱入子部藝術史部十五類曰正

史曰編年曰詔令奏議曰別史曰雜史曰傳記曰

史鈔曰載記曰時令曰地理曰職官曰政書曰目

錄曰史評雜史類別瑣碎記錄入子部小說雜家

子部十四類曰儒家曰兵家曰法家曰農家曰醫

家曰天文算法曰術數曰藝術曰譜錄曰雜家曰



類書曰小說曰釋家曰道家集部五類曰楚詞曰

別集曰總集曰詩文評曰詞曲其編錄叙次遵

諭經首易注史首史記子首老子集依時代而

聖祖

世宗

皇上御製集冠于本朝集首每庫繕寫四分做浙江

范氏天一閣式建文淵在內文源圓明在內文津在熱

河文溯在盛京四閣貯之並有

御製記又擇其精醇為薈要計全書三之一繕寫二分

一藏大內一藏圓明園凡編錄十三年告竣

四庫共存書三千四百六十種計七萬五千八百

五十四卷輯簡明日錄以便稽覽底本仍貯翰林

院內其辦理臣工暨保舉紳士仰邀

恩賚優敘自具館錄茲不贅焉

鑿儀衛外駕庫在東長安門外北向

理藩院署在玉河橋東東長安街南向本朝特設掌

外藩蒙古及喇嘛回部金川事

世宗御書堂額曰宣化退方

堂子在長安左門外玉河橋東順治元年九月建街門

北向內門西向正中為祭

神殿南向前為拜

天圓殿殿南正中設大內致祭立杆石座次稍後兩

翼分設各六行行各六重第一重為皇子致祭立

杆石座次親王郡王貝勒貝子公以次序列北向東

南為上

神殿南向凡每歲元旦及月朔國有大事則為祈為報

皆恭詣

堂子行禮大出入必告凱旋則列燹而告典至重也元

旦有掛錢之禮貝勒以下不掛月朔日親王以下貝

子以上各遣一人供獻春秋二季立杆致祭俟大

內致祭以後各以次輪一日致祭將軍等不得預焉

其儀制

皇上禮服乘禮輿鹵簿前導祭時行三跪九拜禮漢大

臣不隨往

昭忠祠在玉河橋東南雍正二年

敕建祀本朝王公大臣官員之全忠盡節者有

世宗御製碑文

裕親王府在昭忠祠西臺基廠

安郡王府在臺基廠南口

太僕寺署在東城根南玉河橋東

世宗御書堂額曰勤字天育

太僕寺石刻畫馬二一史道碩畫一趙孟頫畫皆明  
王世貞官太僕時所摩勒也道碩五代時人按今兵  
部夾道仍稱太僕寺胡同卽舊署址石刻無考

肅親王府在南玉河橋東

三官廟在南薰坊南玉河橋東明嘉靖間建有修撰朱  
之蕃職方郎中申用懋二碑今存

元寧觀在三官廟東有明天順四年編修陳鑑碑隆慶  
辛未嚴州府知府郭九疇碑

南之左曰崇文門元爲文明門卽哈達門哈達大王府  
在門內因名之明正統間改今名

明薛瑄夏日出文明門詩文明門外柳陰陰百轉  
黃鸝送好音行過御溝回望處鳳皇樓閣五雲深  
化成寺在崇文門內大街路西雍正二年建乾隆三十

二年重修有

御書額

○吳匏菴亦樂園在崇文街有海月菴王延亭春草池  
醉眠橋冷澹泉養鶴闌今不可考

明吳寬玉延亭成次陳玉汝韻詩偶栽山藥得佳  
名墻下幽亭一日成車馬勒回無俗士壺觴傾倒  
盡平生升階脫屣長頭近倚檻觀書老眼明此後  
來遊誰復障繞籬須爲惜殘英

考按玉延亭海月菴析津日記云訪其遺蹟已不  
可得而春明夢餘錄以爲在皇城之西故朱彝尊  
原書列之巾城西偏其實亦傳聞之辭耳今考河  
南彭氏所藏張見陽補畫玉延亭圖有趙寬賦序  
云春坊先生所居崇文街第有園一區名亦樂中  
有亭曰玉延賦首又云並東郭之青陽則斯亭應  
在東城又考毛澄重建玉延亭記云園中別有菴  
曰海月玉延爲菴之輔則海月菴與玉延亭毘連  
無疑故移于東城特其舊址今亦無考

靈藏觀音寺在觀音寺胡同明正統間重修有編修陳

文華碑寺內藤胎海潮觀音像相傳明內府所出

于少保祠在明時坊崇文門內東裱褙胡同公故賜宅

楹中塑公像春秋遣太常寺官致祭

沈德潛謁于忠肅祠詩神龍困魚服司馬握兵權

早決飴甥計蓋同宋室遷廟堂勞定位刀俎答籌

邊晤對文山像忘身知有年

忠肅自在事後嘗懸文文山像于卧所

考按今祠已廢裱褙胡同內有福德祠地甚狹相

傳卽其舊址

總督倉場公署在裱褙胡同內

世宗御書堂額曰慎儲九穀

苦井在蘇州胡同明弘治間正月朔日晨有術士汲其

水往甜井中易水而來向井說詛而下之此井遂變

為甜水

查嗣琛雜咏詩柄鑿流傳事不侔誰分涇渭定于

秋移將苦水成甜水喚作蘇州是薊州

考按井在蘇州胡同內麻線胡同三元菴前居民

至今資以汲飲

大石橋在崇文門內東南又東有泡子河橋

泡子河在崇文門之東城角前有長溪後有廣淀高堞環其東天臺峙其北兩岸多高槐垂柳空水澄鮮林木明秀不獨秋冬之際難爲懷也河上諸招提苦無大者水濱之頽園廢圃多置不葺城內自德勝河外惟此二三里間無車塵市囂惜無命駕者耳

泡子河卽元人所開通惠河也

明陸啟滋泡子河詩不遠市塵外泓然別有天石橋將盡岸春雨過平川雙闕晴分影千樓夕起烟  
因河名泡子悟得海無邊

考按泡子河在今崇文門東城角觀象臺前河身尚存經呂公祠南石橋出南水門入通惠河與燕都游覽志所記合

慈雲寺在泡子河西岸明萬歷年建 本朝順治間修俗稱十方寺

呂公堂在泡子河東明成化年建嘉靖中錦衣千戶陸檜新之萬歷甲寅賜名護國永安宮有額秉謙碑

呂公堂以乞夢有驗歲大比諸士子爭往焉

泡子河呂公祠後有物白氣竟丈夜游水而人或見

之則倒入水作鼓漿聲或曰水掛也

明葛一龍秋夜同武仲宿呂公堂詩草木自烟霧  
居塵水半周帝城偏一角仙路入高秋月曬地雷  
起風翻天漢流相期同襪被清極夢難游

華嚴禪林在呂公堂南有明萬歷五年重修碑

關帝廟在呂公堂北有明碑二磨泐無考

太清宮在呂公堂南卽玉皇閣有明萬歷間國子監司  
業顧起元碑

閣其卑隘明萬歷間鍊師劉靜祝拓而大之內府出

帑金俾塑福祿壽三星像更其額曰太清宮

寶源局新廠在泡子河

○泡子河南岸有方家園張家園房家園北岸有張家  
園傅家東西園中呂公堂西楊氏秘園東玉皇閣北  
去貢院里許

查嗣琛雜咏詩張園酒罷傳園詩泡子河邊馬去  
遲踏遍槐花黃滿路秋來祈夢呂公祠

○般若菴在明時坊有勅建碑今廢

觀象臺在城東南隅堞堵上元至元十六年建中爲紫

微殿內有

御書聯扁臺上舊有元郭守敬所製渾天儀簡儀銅球  
量天尺諸器 本朝康熙十二年以舊儀年久多不  
可用

御製新儀凡六曰天體儀曰赤道儀曰黃道儀曰地平  
經儀曰地平緯儀曰紀限儀陳于臺上至今遵用其  
舊儀移藏臺下五十四年又製地平經緯儀乾隆九  
年又製璇衡撫辰儀並陳臺上

占風竿亦名順風旗上有鐵箍二十八道以象二十

八宿之數也

紫微殿東小室曰壺房卽浮漏堂內有銅人一銅壺  
五首曰日天壺次日夜天壺次日平壺次日萬水壺  
後曰分水壺每逢日月交食前三日調壺則置銅人  
于萬水壺上面南抱箭箭又名量天尺長三尺一寸  
鑄書夜時刻上起午正下盡午初壺中安箭舟如銅  
鼓形水長舟浮則箭上出水盈箭盡則洩之于池箭  
上時刻與赤道相符晝夜一周再注水亦如之則雖  
遇陰雨時刻亦無差矣是銅人爲調壺所用並不占



日晷長短也東廂五間爲測量所又別有室三楹爲  
晷影堂南北平置銅圭于石臺長一丈六尺二寸濶  
二尺七寸周以水渠南端植銅表高八尺土設橫梁  
用影符以取中景 本朝加表二尺上端施銅葉中  
穿圓孔徑二分午正日景自圓孔透圭面成橢形南  
界爲日體 景北界爲日體下景中心爲中景 京  
師夏至景二尺九寸四分八釐冬至景一丈九尺九  
寸四分以次羸縮北端設立圭高三尺五寸冬至景  
上立圭二尺七寸四釐並無銅人北面抱箭也春明

夢餘錄五雜俎以爲銅人捧箭北面室入其頂以候  
日中測景之長短者蓋以銅漏與日表兩事混而爲  
一耳

元吳師道九月二十三日城外紀遊作杪秋暇日  
休弦歌五門城外觀新河斗門決水已數日淺沙  
漫漫無餘波縱橫疏鑿引別派監官督役猶揮訶  
循堤側足懼疏惡驚見崩圻當盤渦故橋舊市不  
復識祇有積土高坡陀城南靡靡度阡陌疎柳掩  
映連枯荷清臺突兀出天半金光耀日如新磨璣

衡遺製此其的衆環倚植森交柯細書深刻皇祐  
字觀者歎息爭摩挲司天貴重幸不毀回首荆棘  
悲銅駝長春宮苑最宏麗飛樓鴻殿凌層坡喬松  
天矯白歲物復有偃蓋低婆娑平生數聞百一帖  
樂石置壁周簷阿金源中葉盛文物玉堂學士鏤  
鳴珂旁搜紙墨作漆飾欲與唐晉爭嵯峨至今臺  
榻傳好事道士劫換人間鴉仙杯珍襲巨桃核御  
畫雲鶴題宣和不知何處有此木偶而結實良非  
他瑤池漢殿語茫昧遂使世俗猶傳訛尋幽訪古

意未已起視落日歸禽多却趨林亭憇清絕盆菊  
采采黃金窩蟹螯斫雪新醞碧對此不樂將如何  
京華酒鑪萬歌舞錦鞵翠袖迎嬌娥儒冠已受俗  
子笑况復衰容雙鬢皤下帷閉閣來跡少骯髒不  
肯侯王過清遊良友幸追逐未忍返棹尋魚簑今  
朝不飲心已醉笑看坐客朱顏酡鳳城半掩歸路  
暝爭道擊轂如飛梭九衢冥濛漲塵霧漸見燈火  
稀星羅作詩寫實不可緩馬上已復成微哦

考按元之都城在東北白馬廟柴市瓊華島皆在

南城今之觀象臺則在南城之外鐘鼓樓爲元之中心閣德勝門外土城關舊址猶存故吳正傳紀遊詩謂爲南城外耳

貢院在城東隅觀象臺西北元禮部舊基也明永樂間改爲貢院萬曆間拓旁地益之本朝屢加增葺益爲宏備乾隆九年

皇上幸貢院御製七言律四首勒石至公堂中

長元按乾隆甲子

御製貢院詩有從今不薄讀書人言孔孟言大是難之

句一時士林傳誦爲之感泣詞臣張鵬翀和詩云

添得青袍多少淚百年雨露萬年心蓋紀實也

聚奎堂有明代王圖庚戌取士詩天啟四年其子淑

卞和之刻石壁間

正藍旗護軍統領署在崇文門內乾麪胡同

鑲白旗滿洲蒙古漢軍三旗與正白旗接界之處係自

豹房胡同向南至單牌樓與正藍旗接界之處由

皇城根向東至大城根滿洲官兵自正白旗接界處

由東長胡同循大街向南至阮府胡同東口爲頭叅

領之十七佐領居址自阮府胡同東口至長安街牌樓爲二叅領之十六佐領居址東安大街兩邊之翠花胡同草廠胡同東長胡同奶子府胡同燒酒胡同錫蠟胡同菜廠胡同阮府胡同梯子胡同理藩院後胡同爲三叅領之十八佐領居址自長安街牌樓向東至單牌樓爲四叅領之十七佐領居址自燈市口大街西口至東四牌樓大街向南所有椿樹胡同乾魚胡同西堂子胡同金銀胡同煤炸胡同帥府胡同頭條二條三條胡同爲五叅領之十七佐領居址蒙古官兵自四牌樓向南循大街至堂子胡同爲頭叅領之十二佐領居址自堂子胡同向南至單牌樓爲二叅領之十二佐領居址漢軍官兵自四牌樓向東至小街爲頭叅領之五佐領居址自小街至朝陽門爲二叅領之四佐領居址祿米倉周圍之啞巴胡同方家胡同爲三叅領之四佐領居址小街之史家胡同乾麪胡同小啞巴胡同爲四叅領之四佐領居址羊尾巴胡同石大人胡同羊乙賓胡同總把胡同爲五叅領之五佐領居址

王府街在東安門東南明永樂十五年建十王邸通為屋八千三百五十楹宣德三年作公主府三所于諸王邸之南

會同館在王府街為在京牧養驛馬之所有館大使

○烏蠻市在王府街之會同館今無考

豫親王府在東單牌樓西三條胡同

寧郡王府在東單牌樓北大街

正監旗覺羅宗學在東安門東南大阮胡同

旛竿寺在保大坊雙碾胡同俗稱捨飯寺元至元間建

明永樂中給光祿寺粟米煮飯以施貧民 本朝改

名興福禪林

賢良寺在東安門外帥府胡同雍正十二年建本怡賢

親王故邸捨地為寺 賜名賢良乾隆二十年移建

于冰盞胡同有

世宗御製碑暨

今上御書心經塔碑

內務府帽作在東安門外錫蠟胡同

亮鐵作在東安門外迤北西向

崇真萬壽宮在蓬萊坊草廠眉掠胡同元至元中建真人張留孫吳全節相繼居此俗各天帥菴

張留孫信州貴溪人入龍虎山爲道士有相者曰子神仙宰相也至元間從天師入京世祖與語稱旨留侍闕下建崇真宮居之嘗祠醮有鶴舞之瑞號天師宮內有五色薔薇真人吳閑閑手植

明會棨詩崇真宮闕禁城東舊說真人住此中鳳去縵山虛夜月鶴歸華表怨秋風飛花入戶丹房靜古木垂蘿碧殿空一笑忽逢勾漏令將因報日

問參同

纓白旗蒙古都統署在王府大街乾魚胡同

元極觀在乾魚胡同

成壽寺在澄清坊椿樹胡同明成化間內監夏時建時有弟詔封羽教禪師住此寺有勅建碑

燈市在東安門王府大街東崇文街之西亘二里許南北兩廡凡珠玉寶器以遠日用微物無不悉具衢中列市棊置數行相對俱高樓樓設瓊瑜簾幕爲燕飲地一樓每日賃值至數百緡者夜則燃燈于上望如

星衢市自正月初八日起至十八日始罷鬻燈在市西南有冰燈細剪百綵澆水成之按宋時燈市乃從九月菊燈始今止正月內數日耳

考按今東安門外稍北猶有燈市口之名燈市久廢

明石崑玉燈市詩燈市百貨聚類聚還分局雜沓掩塵埃穹窿象山谷波斯細舉名最下亦珠玉滿城恣意觀履烏時交觸側肩趨友朋轉盼遺童僕樓上樓下人徙倚自相矚重器與嬌容回還日不

足倘非挾厚藏焉用空馳逐惟我獨閒行輝煌聊飽目佻佻白面郎囊裡金如粟訪古探瑰奇十僅償其六本擬快于心旁觀容有蹙爲君話所從原出巨家積向購此場中而今在此鬻佇看市道間何事無翻覆物類火傳薪人寰風轉燭拚諸海陸珍權與豪華畜姑數杖頭錢來酣春酒熟

明范景文詩御溝春暖漲冰絲風煖沙吹日影移珠綴九微光燦爛張燈不待月高時 王孫約隊簇金貂玉勒青驄綺陌驕文貝珊瑚看不盡東華

門外市三條 朱樓一帶鬱嵯峨陣陣香風襯綺  
羅龍燭薰風墮不夜天街到處月明多 月明處  
處度笙簫春色分明念四橋有酒勸君須盡醉百  
年能得幾元宵

張貞子府在燈市東

明照坊在東安門東北

元宋數明照坊對兩詩章臺車馬去如流白雨霏  
烟拂畫樓九陌平鋪明似練兩溝急瀉碧于油美  
人虹見西山兩少女風來北里秋涼意滿襟簾幙

捲宮鴉歸樹夕陽收

法華寺在明照坊今豹房胡同明景泰中太監劉通捨  
宅建天啟中賜藏經聖書有大學士黃立極碑

正白旗蒙古都統署漢軍都統署俱在豹房胡同

鑲白旗護軍統領署在驢市胡同

報恩寺在驢市胡同街北內有大鐘上鑄昭寧寺小鐘  
上鑄報恩寺是始稱報恩而天順改名昭寧寺者有  
大學士李賢碑今無考

大學士一等誠謀英勇公阿第在燈草胡同



鑲白旗漢軍都統署在燈草胡同

左翼前鋒統領衙門在本司胡同

正藍旗滿洲蒙古漢軍三都統署皆在本司胡同

黃華坊有東院有本司胡同本司者教坊司也又有

勾闌胡同演樂胡同相近復有馬姑娘胡同宋姑娘

胡同粉子胡同出城則有南院皆舊日之北里也

京師倡家東西院籍隸教坊猶是唐宜春院遺意東

院以瑟西院以琵琶藉勳戚以避貴游之擾

考按本司胡同勾闌胡同馬姑娘胡同在四牌樓

南宋姑娘胡同粉子胡同在四牌樓北今仍其名

一等誠嘉毅勇公第在勾闌胡同

鑲白旗滿洲都統署在燈市口大街

二郎廟在黃華坊燈市口大街東僅一小殿康熙間重

修倉場侍郎石文柱碑云據道書稱二郎神爲清源

真君唐貞觀三年創廟于此宋元祐二年重修

長元按二郎神爲秦蜀將李冰之子鑿離堆江有

功于民蜀人祀之 本朝雍正五年

詔封李冰爲敷澤興濟通佑王李二郎爲承績廣惠顯

英王又碑稱唐貞觀二年創廟于此則北宋時燕屬于遼不得云元祐二年重修也

左翼宗學在燈市口

元貞觀在總把胡同明舊剎碑磨泐無考

雙忠祠在石大人胡同乾隆十六年建合祀都統贈一等伯謚襄烈傅清左都御史贈一等伯謚壯果拉布敦有

御制雙忠詩碑

寶源局在石大人胡同即明石亨舊宅

睿親王府在石大人胡同東

正藍旗官學在東四牌樓南新開路

鑲白旗官學在齊鳳樓胡同內象鼻坑

○銅馬門在舊城東南隅昔慕容儁鑄銅馬置之東掖門外今有銅馬坊

薊城南北九里東西七里開十門慕容儁鑄銅爲馬因名銅馬門今大廳前石函長二尺高一丈歷代不敢開銘曰泰建二年造銅虎符

東掖門下舊慕容儁立銅馬像處昔慕容隗有駿馬

赭白有奇相逸力至雋光壽元年四十九歲矣而駿  
逸不虧雋奇之比鮑氏驄命鑄銅以圖其像親爲銘  
贊鑄頌其旁像成而馬死矣

考按銅馬門今廢以元一統志考之當在此也

長元按魏征南將軍劉靖高梁河碑云碑在大城  
東門內道左則晉魏時幽州城在今京城西北慕  
容氏鑄銅馬于東掖門下約今西直德勝二門之  
外明姚廣孝薊門詩不知銅馬坊何在惟見桑乾  
水自流其地位當不遠也元一統志恐未盡合

關帝廟在羊尾巴胡同有明萬歷乙巳年鼎一癸巳年

鐘一 本朝康熙間重修鐘

維摩菴在黃華坊小啞巴胡同明萬歷間左光斗撰碑  
清泰寺在大啞巴胡同明弘治年建正德賜額清泰有  
編修余本御史包澤二碑又嘉靖間鴻臚寺序班王  
璋重修碑

寶慶寺在內城東元建明永樂嘉靖間兩次重修 本  
朝雍正間有中書吳磨碑

考按寶慶寺無考今以吳磨碑文觀之或卽寰宇

通志所載寶磬之訛也

智化寺在黃華坊祿米倉東寺爲明宦官王振所建天順間詔復振官塑像于寺中之北勒碑其中 木朝乾隆間御史沈廷芳奏毀之

寺兩存二石獅云卽明武學遺址

○京衛武學始于正統六年除教授一員訓導六員教習勳衛子弟以兵部司官提調之以國子監丞掌學事成化己丑建大成殿祀 孔子并四配像祿米倉在南小街東

○東院在總舖胡同東城畔昔時歌舞地今寥寥數家如村舍猶記舊遊有陳家園郝家亭子樹石楚楚今無存矣

○方園在東院之東園毀建淨業菴于其址殿左廡有鎮陽林潮書元許魯齋演千字文以明萬歷十一年刻石嵌于壁今已廢方園猶存其名

正白旗官學在朝陽門內南小街新鮮胡同

正白旗覺羅宗學在南小街新鮮胡同

證因寺在南小街竹竿胡同有明天順六年鐘一碑磨

去無考

○靖恭寺在黃華坊今廢

老君堂在朝陽門內南小街路東

補饒餘親王府在石大人胡同

一等超武公第在東堂子胡同

一等褒績公第在金銀胡同

一等延恩侯第在崇文門內歲栢胡同

一等順義侯第在崇文門東南開市口

宸垣識畧卷五

宸垣識畧卷六

仁和吳長元太初氏輯

內城二

東中北  
東北

正白旗滿洲蒙古漢軍三旗與鑲黃旗接界之處係自

府學胡同東口向南各按叅領至四牌樓豹房胡同

東口與鑲白旗接界之處由 皇城根東至大城根

滿洲官兵自鑲黃旗接界之處棉花胡同循大街向

南至大佛寺西北角為頭叅領之十七佐領居址自

大佛寺西北角向南至豹房胡同西口為二叅領之

十六佐領居址 皇城東邊之寬街草廠胡同取燈  
胡同瞭穀胡同弓弦胡同雙塔胡同爲三叅領之十  
六佐領居址兩大街所有之鐵獅子胡同賈家胡同  
汪芝蔴胡同魏家胡同十景花園馬大人胡同墻兒  
胡同大佛寺胡同羊尾巴胡同山老兒胡同喇叭營  
爲四叅領之十六佐領居址自馬市口向東至四牌  
樓隆福寺周圍所有細小胡同爲五叅領之十六佐  
領居址蒙古官兵自府學胡同東口循大街至五條  
胡同爲頭叅領之十五佐領居址自五條胡同至四

牌樓爲二叅領之十四佐領居址漢軍官兵自新橋  
大街至東直門爲頭叅領之十佐領居址北新倉海  
運倉興平倉南新倉舊太倉富新倉此六倉門相近  
爲二叅領之十佐領居址自東直門南小街北口宋  
姑娘胡同口袋胡同慧照寺王家胡同船板胡同爲  
三叅領之十一佐領居址北新橋大街之六條七條  
八條九條十條胡同爲四叅領之九佐領居址北小  
街之頭條二條三條四條五條胡同爲五叅領之九  
佐領居址

迎禧觀在王府大街

延禧寺在保大坊弓弦胡同

一等果毅繼勇公第在 皇城東寬街

大隆福寺在仁壽坊東四牌樓大市街之西馬市北其

街以寺得名明景泰二年建役夫萬人撤英宗南內

木石助之其白石臺欄乃南內翔鳳等殿石闌干也

本朝雍正九年重修每月之九十兩日有廟市百

貨駢闐為諸市冠所居皆喇嘛有

世宗御製碑

明釋性柔過隆福寺詩金碧先朝寺香燈出內家

松杉留古籟闌楯落天花爽入西山影晴飛北闕

霞翠華行復駐望望暮雲遮

查嗣琛雜咏詩興隆隆福兩岩巒南內移來土木

饒天子不開香火院紛紛臺省愧楊姚

宋光熊游隆福寺詩玉石扶闌此尚存秋風南內

黯銷魂若教暫緩金仙祀香火何如好弟昆 古

玩珍奇百物饒黃金滿橐儘堪銷阿誰携得三錢

刺盡日吟哦自解嘲 康熙間寶應朱克生于慈仁寺市以三錢買客氏拜敬刺

賦客氏行見池北偶談

○仰山寺在仁壽坊云有前後街今無考

普德寺俗呼大佛寺在王府街北柴市西口稍南建置歲月無考

長元按王府街自此迤西轉北呼安定門街

誠親王府在大佛寺北路西

誠固山貝子府在取燈胡同

順天府儒學在教忠坊府學胡同明宣德中建其地元之柴市宋文天祥授命焉

順天府學故報恩寺也元未有僧遊湘潭募造報恩寺尚未安像明師下燕戒士卒毋得入孔聖廟僧倉皇借宣聖木主置殿後不敢去遂以為學

文丞相祠在府學胡同明初北平按察司副使劉崧立宣德間命有司春秋祭祀景泰中賜諡忠烈遺像改塑丞相衣冠

歷代忠臣祠府尹致祭必用祭服惟此用常服

明章懋謁文丞相祠詩元宋興亡迹已陳忠臣祠宇尚如新夕陽古樹烟猶曠夜雨荒堦草自春慷慨



慨六歌空洒淚間關百戰竟捐身穆陵地下應含笑不負臚傳第一人

明顧清謁文山祠詩碧殿長松鎖十尋晚雲將雪助悲吟貂蟬不改厓山制金石疑聞孔壁音南去星潮嗟往事北來祠宇豈公心春風一掬唐衢淚幾爲先生濕短襟

崇禎十七年三月戊申左都御史李邦華縊于文丞相祠 本朝賜諡忠肅

考文山所著日錄諸書相傳並刊板祠中今皆無有惟唐李邕書雲麾將軍李秀斷碑二礎尚繫于壁破屋三間塑像兀坐冠進賢冠朱衣色黯神座之右石刻半像執笏冠如明世國公笏刻孔曰成仁孟曰取義數語

唐雲麾將軍李秀碑靈昌郡太守李邕文并逸人太原郭卓然摹勒并題額李秀字元秀范陽人唐玄宗朝以功拜雲麾將軍左豹韜衛翊府中郎將封遼西郡開國公卒于開元四年葬范陽福祿鄉碑刻于天寶元年李北海有兩雲麾碑一爲李思訓在陝西一

爲此碑其官同其姓同也然其碑筆法道逸大勝陝  
碑秦人有著石墨鐫華者乃以爲一碑且以此碑爲  
趙松雲所臨誤矣此碑貯良鄉縣庫中不知何時入  
都城宛平令李蔭掘地得六礎洗視乃雲麾碑建古  
墨齋以覆之後移少京兆署中止二礎其四礎傳爲  
萬歷中王京兆惟儉携去汴中按秀碑之遷徙始末  
吳涵記之甚詳碑始斷而斲之爲礎者良鄉學生某  
以其石告者閩人董生輦而致之作古墨齋以貯之  
者宛平知縣李蔭其後携六礎之四至汴而留其二

者爲順天府尹王惟儉自府署又遷之置文丞相祠  
壁者爲順天府丞吳涵至四礎入汴不知所在

考按石像雲麾將軍斷碑二礎及吳涵記今在祠  
東壁懷忠會館在祠西今無考

恭親王府在鐵獅子胡同

一等襄勇伯第在東四牌樓西北嘎嘎胡同

○成國公適景園在東四牌樓西北地名十景花園

明劉應吉集成國公山亭詩高臺亭子禁城東少  
得浮埃多得空榆柳周遭陰洞色門余直射遠晴

風荒烟莫辨郊原際夕照歸明官殿中閣後古槐  
何嶽嶽老看山水幾雌雄

寶泉局南廠在錢糧胡同

正白旗覺羅宗學在東四牌樓東北十條胡同

正白旗護軍統領署在東四牌樓東北十條胡同

五嶽菴在十條胡同明建羽士居之內供玉纘五嶽真  
形圖因各有嘉靖間工部侍郎張憲碑

二等昭信伯第在東四牌樓北九條胡同

承恩寺在南居賢坊東四牌樓北八條胡同明萬曆開

建有大學士張居正碑今失

正覺寺在東四牌樓北八條胡同明正統間建有碑

御前大臣一等超勇公海第在東四牌樓北七條胡同

水月寺在東四牌樓北五條胡同有舊碑篆水月菴三  
字

寶泉局東廠在東四牌樓北四條胡同

協辦大學士吏部尚書一等嘉勇公福第在東四牌樓  
北二條胡同

火器營衙門在東四牌樓西

左翼稅署在東四牌樓之西大街

大慈延福宮在思城坊齊化門大街明成化中建以奉  
天地水府三元之神有成化御製碑 本朝乾隆三  
十六年奉

敕重修有 御製碑

○大覺寺遼築義井精舍于開陽門之郭傍有古井清  
涼滑甘因以名焉金大定中僧善祖營寺朝廷嘉之  
賜名大覺萬松老人住持大覺榜其齋曰昨夢

考析津志義井一在齊化門太廟前一在思城坊洞

陽觀前今大覺寺既廢義井亦不可考矣

福安寺在瓦盆胡同元至正間建明正統中重修賜額  
正東曰朝陽門元爲齊化門明正統改今名又元正東  
曰崇仁門東之左曰光熙門東之右曰齊化門今崇  
仁門久廢齊化門俗猶稱之

明兵入京師大將召丁好禮不肯行昇至齊化門不  
屈而死

○元太廟在都城齊化門街曰寅賓里廟門外馳道抵  
齊化門之通衢

○無量壽菴在寅賓里太廟之西居士屠文正建居士山陽人事親至孝至元間被兵驅至開平母子相失南望悲泣禮佛絕葷酒還至大都師事滿禪師于慶壽寺後知其母已沒作無量壽菴浚井治圃手植嘉木至元二十七年四月七日沐浴更衣書頌有白虹垂菴中如飛橋踟躕而逝

考按昔之寅賓里當在今之思城坊無量菴今廢齊化門南有無量大胡同相傳卽其故址以坊巷集考之蓋吳良大人之訛也

恒親王府在齊化門內燒酒胡同

永豐觀在南居賢坊燒酒胡同今名永祥禪林明景泰間建賜額有成化間戶部尚書薛遠碑

多羅恭勤貝勒府在北小街舊太倉南

怡親王府在北小街

○聖姑寺久廢今北小街有皇姑園胡同或卽其址

○老君堂在北小街有老君堂胡同卽洞陽觀舊址

正白旗滿洲都統署在老君堂胡同

南新倉舊太倉富新倉興平倉在朝陽門內北小街東

海運倉北新倉在北小街東近東直門

長元按京城諸倉俱倉場侍郎所管

慧照寺在北小街北口其胡同卽以寺名明成化間僧庭佑得永寧伯譚氏故宅建賜額有弘治十年碑

○園亭之在東城者曰梁氏園曰楊舍人泌園曰張氏陸舟曰恭順侯吳國華爲園曰英國公張園成國公適景園後歸武清李侯曰萬駙馬曲水園曰冉駙馬宜園園故仇鸞所築鸞敗歸成國公後歸于冉

明薛蕙宴英國公山亭卽賜第詩東第君王賜西

園賓客來將軍原好士公子復憐才玉袖花間出

金尊竹下開還須明月上莫畏夕陽催

長元按以上園亭遺址今俱無考

鑲黃旗滿洲蒙古漢軍三旗各按叅領自鼓樓向東至新橋自新橋大街北口城根向南至府學胡同係與正白旗接界滿洲官兵自鼓樓向東循大街至經廠爲頭叅領之十七佐領居址自經廠循交道口轉南至棉花胡同東口爲二叅領之十七佐領居址自南鑼鼓巷北口至南口南鑼鼓巷兩邊之鼓樓院方磚

敝真武廟魚兒胡同福祥寺帽兒胡同炒豆胡同棉  
花胡同兵馬司前圓恩寺後圓恩寺局兒胡同爲三  
叅領之十八佐領居址自交道口大街向東循新橋  
轉南至香兒胡同東口爲四叅領之十七佐領居址  
自香兒胡同東口向南至府學胡同馬將軍胡同大  
興縣騷達子胡同土兒胡同香兒胡同錢局周圍爲  
五叅領之十七佐領居址蒙古官兵自交道口大街  
向北至安定門爲頭叅領之十四佐領居址自北鑼  
鼓巷兩邊所有之倒沙胡同經榭粉子亭謝家胡同  
伽藍殿法通寺淨土寺豆腐池兒胡同高古菴郎家  
胡同碾兒胡同爲二叅領之十四佐領居址漢軍官  
兵自新橋大街向北至方家胡同爲頭叅領之十佐  
領居址自方家胡同北至城根爲二叅領之十一佐  
領居址國子監前後頭條二條三條胡同方家胡同  
國子監大溝巷蕭家胡同爲三叅領之十一佐領居  
址栢林寺前所有之鼓哨胡同草廠王大人胡同栢  
林寺爲四叅領之十一佐領居址自北小街南口至  
城根胡椒園之周圍手帕胡同針線胡同寬街爲五

叅領之十佐領居址

鼓樓在地安門北金臺坊舊名齊政樓元建上置銅刻漏制極精妙故老相傳以爲先宋故物其制爲銅漏壺四上曰天池次曰平水又次曰萬分下曰收水中安鏡神設機械時至則每刻擊鏡者八以壺水漏爲度涸則隨時增添冬則用溫水云按今鼓樓不用銅壺等物惟以時辰香定更次其漏壺室猶存銅刻漏無考

齊政樓都城之麗譙也東中心閣大街東去卽大都府治所南卽海子橋澄清閘西斜街過鳳池坊北鐘樓此樓正居都城之中樓下三門樓之東南轉角街市俱是針鋪西斜街臨海子率多歌臺酒館有望湖亭昔日皆貴官遊賞之地樓之左右俱有果米餅麵柴炭器用之屬齊政者書璇璣玉衡以齊七政之義鐘樓在金臺坊東卽萬寧寺之中心閣元至元中建今之鐘樓在鼓樓北明永樂中建後燬于火本朝乾隆十年重建有

御製碑



定垣諸畧  
鐘樓之制雄敞高明與鼓樓相望有八隅四井之號  
蓋東西南北街道最爲寬廣至元中建閣四阿簷三  
重懸鐘于上聲遠愈聞之

○中心閣在大都府西元建以其適都城中故名中心  
臺在閣東十五步其臺方幅一畝以牆繚繞正南有  
石碑刻曰中心之臺實都中東西南北四方之中也  
有敵樓一十二座窩鋪二百四十三座

考按析津志所載中心閣中心臺舊蹟俱無考今  
舊鼓樓大街北城牆有中心臺之名蓋元時都城

### 偏北疑其遺址

萬寧寺在金臺坊鼓樓東偏元大德中建以奉安成宗  
御像名天壽萬寧寺有穹碑二長各二丈餘一碑國  
書一碑歐陽原功撰文張起巖書姚慶篆額明碑四  
一爲馮祭酒夢禎文一爲焦太史竝文

成宗布爾罕皇后京師勅建萬寧寺中塑秘密像生  
形醜怪后以帕蒙覆其面尋傳旨毀之布爾罕蒙古  
語佛也

慈善寺在鼓樓大街路東有明萬歷間頒賜藏經并敕

書一道及通政司李琦碑 本朝康熙間修有

聖祖御書額

顯佑宮在地安門東北奉真武明永樂間建成化中修  
俱有碑 本朝雍正九年重修歲遣官致祭乾隆間  
又修有

御書聯額并 御製碑

廟中丹墀砌石上有文象梅梢古月蓋舊物也

步軍統領衙門在地安門外顯佑官之右俗稱提督衙  
門領禁軍司九門啟閉并緝捕之事

萬寧橋在鼓樓南名澄清聞卽今後門橋金水河自此  
而東南入東步糧橋穿 皇城東南而出

元馬祖常御溝春日詩御溝流水曉潺潺直似長  
虹曲似環流入官墻才咫尺便分天上與人間

春波十頃碧琉璃向日樓臺照影時好爲畫船多  
載酒半酣西望碧參差 水南沙路雨清塵桃李

花開蛺蝶春三月京華寒食近東風十里酒旗新  
元張翥金水河聞苑池荷香作立馬金橋上荷香  
出苑池石橋秋雨後瑤海夕陽時深樹棲鴉早微

波浴象遲煩襟一笑爽正喜好風吹

福祥寺在靖恭坊簑衣胡同舊作簑衣寺有明正德中

沈燾碑萬歷中大學士趙志臯碑

文昌宮在靖恭坊帽兒胡同乾隆間重修西有斗母宮

圓恩寺在昭回坊圓恩寺胡同元至元間建寺西有廣

慈菴碑碣有建立十方院圓恩是比隣之句

鑲黃旗官學在安定門大街圓恩寺胡同

千佛寺卽吉祥寺在金臺坊順天府治西元泰定間建

明嘉靖間碑畧云卽元之千佛寺在都城坎地金臺

坊舊有石刻云元貞丙申建至宣德癸丑凡百三十

八年因故址而新之遂爲精藍正統戊午敕賜吉祥

寺而俗猶以千佛寺稱之萬歷九年另建千佛寺于

德勝門北八步口遂稱小千佛寺以別之

寶泉局西廠在北鑼鼓巷千佛寺胡同

法通寺元至正間建明成化中復建名曰淨業弘治中

翰林學士汪諧爲之記萬歷間修有戶部主事劉應

詔碑本朝康熙間重修改名淨因寺侍讀學士查

昇撰碑有

聖祖御書淨因寺拈花正教二額

慈隆寺在教忠坊高公庵胡同因寺爲明萬歷間太監高勲所建名之其西爲酒醋胡同萬歷間有洗馬朱

國祚碑

淨土寺在淨土寺胡同有明嘉靖間碑

順天府署在鼓樓東靈椿坊安定大街之西卽元大都路摠治舊署明爲順天府今仍之有

世宗御書堂額曰肅清畿甸

先是遼升爲京立幽都府又改爲析津府至金爲大興府元初爲大都路號大興府官署爲宗正所據官吏辦事佛寺中至大中監路平章政事莫吉奏請以錢四萬二千五百緡置靈椿里周氏地計十九畝建爲公署明因之爲順天府

天心堂在順天府後內空洞上覆以格有郡國方位圖冬至日懸毛羽驗氣之盛衰則其歲豐候氣室在東夾道迤北立冬日欽天監官于堂下掘地爲坎深數尺以竹管八實灰其中照方位布立坎內以土覆之至冬至日啟視以占八方之豐歉若管灰全浮

出者為豐不浮者為歉即漢書葭莩灰實律管之法也今無考元劉賡書大路都碑在堂左巋然獨存無錫茹文中居京師之高坡胡同英宗復辟之年百有十歲召見便殿子冠服帶履宴順天府又命公卿造其居賀之

劉猛將軍祠在府治相傳神名承忠吳州人元末官指揮有功後殉節投河民祀之本朝雍正二年

勅建八蜡廟在順天府治東北今無考

長元按劉猛將相傳主蝗蝻祀之亦八蜡遺意

靈椿坊為燕山竇十郎故居或云在城西或云在昌平

或云在涿州或云在薊州當時馮瀛王道贈詩有靈

椿一株老之句今北城有靈椿坊疑是十郎舊里故

元時命名元時坊名皆  
虞文靖所定

元張翥買屋靈椿坊詩五槐濃綠蔭門前東宇西

房十數椽不是衰翁買屋住歸時留作僱船錢

鑲黃旗滿洲都統署在安定門大街交道口

北之東曰安定門元為安貞門明永樂間改今名

元程鉅夫賜地安貞門以築室

鑲黃旗漢軍都統署在安定門大街

極樂寺在崇教北坊安定門大街東元至元間建

大興縣署在安定門內迤南教忠坊南向本秦薊縣地

遼爲析津金名大興元明 本朝仍之

○萬駟馬曲水園在大興縣東園中有松化石其半尚存木質

○宜園在大興縣東冉駟馬園也有石假山名萬年聚明張學會九日集宜園詩小扉幽徑復游賞幸追

陸石自萬年聚花知九日期都人方瞿瞿園蝶已

窺窺尙約移尊就霜風莫便吹

鑲黃旗覺羅宗學在安定門香兒胡同

和親王府在北新橋南

寶泉局在北新橋南大街路西後有濟陽倉

鑲黃旗蒙古都統署在北新橋南大街

開元寺在崇教南坊北新橋路西明勅賜惠明寺 本朝乾隆三十年重修奉

敕改慈壽寺

明天順間趙昂撰敕賜惠明寺碑畧云開元寺住持  
定慧以寺額請謂寺創自唐開元間歷唐宋元以至  
明宣德初再造越歲而功成寺因舊號乞賜改正遂  
賜名惠明寺

寶公寺在慈壽寺東

寶泉局北廠在北新橋三條胡同

天聖寺在三條胡同

國子監在安定門東南崇教坊成賢街卽元之舊學明  
永樂間改爲國子監有國學之西中曰彝倫堂有

聖祖御書賜額又

聖祖御製祭酒箴

世宗御書文行忠信額東廊爲繩愆廳爲鼓房有率性  
誠心崇志三堂西爲博士廳爲鐘房有修道正義廣  
業三堂凡扁聯皆

列聖暨

今上御書又

御製賜南學碑 乾隆五十年建 璧雍宮于集賢門  
內宮四面出向周以環池有橋四前有碑亭一是年

二月上丁

皇上親行釋奠

臨雍講學舉行 盛典有

御製國學新建辟雍園水工成碑記

御製上丁釋奠後臨新建辟雍講學詩四首

御製三老五更說皆勒石

長元按辟雍宮室歷代未建今錄其規制于左辟

雍殿四面各顯三間

明間面闊二丈一尺次間各面闊一丈六尺外週圍廊深

六尺八寸柱高一丈六尺徑一尺八寸擊簷廊深四尺三寸四春攢尖安銅寶頂重簷成造

琉璃牌樓一座

面闊五丈五尺高三丈五尺五寸進深六尺六寸

碑亭二座

各方二丈柱高一丈四尺五寸鐘鼓廳二座各方一丈四尺

柱高一丈六尺五寸橋四座 各長四丈寬二丈二尺丹

陸二道 長二十一丈九尺寬二丈二尺

劉蒨 聖主臨雍禮成恭紀聖世文明啟敷天教

澤宣虞廷垂舊典闕里溯薪傳觀化人文盛當陽

雨露便三雍欽矩獲萬國荷陶甄仰止心彌切崇

儒道必先丹青新結構金碧映堂筵殿廡采恩麗

宮牆棟宇連赤螭分糾結青鳳鬱聯翩瓦燦黃雲



色池流翠藻鮮松筠含古澤絲竹發真詮仰見

乾震惕頻聞 巽命專先期嚴飭備屆日事明燭

旭景浮 金闕晴光起玉泉爐香仙仗外扇影禁

城邊上巳良辰近三春淑氣妍穠花輕著雨細柳

淡籠烟燕翦當風掠鶯梭拂露穿戒塗森羽衛在

廟列宮懸執鬯 皇情肅凝旒 睿志虔馨香流

碧荇疏越發朱弦分奠公卿逮趨陪鴛鴦聯觀光

州十二習禮衆三千祭酒橫經地論鐘造士年朱

衣開絳帳紫幄對青編顧問 龍顏喜颺言虎拜

拳欽明稽古帝性道緒前賢大義昭如日神機啟

自天恩波方浩爾洽象益巍然一德明良會三階

福履駢聞風思鼓舞名藝就雕鏤典制垂千載車

書被八埏小臣叨侍從擬上辟雍篇

國子監古栢元祭酒許衡植

吳苑古栢行夫子廟栢數十株託根自與尋常殊

霜實時時垂玉珮風枝往往鳴笙竽翕貞挺節亭

亭竦儼如冠劍森相拱小者猶留十數圍交柯屈鐵

烟濤湧一株參天勢更奇鬱蟠元氣何淋漓摩挲歲

月猶可識許公手植非傳疑蛟龍攫擊雷雨作黛  
色翻從半空落斑鱗點盡秋後霜百片青銅光灼  
爍新甫山頭樵徑封武侯祠堂碧草叢西川東魯  
遠莫致何由突兀撐晴空當年元儒推第一遺經  
辛苦窮編葺嘉樹栽培用意深周模孔楷千秋則  
至今偃蓋拂雲端雍容子弟趨盤桓豈徒材大資  
梁棟直欲香清集鳳鸞君不見上林崇臺千尺高  
青棠赤桺皆凌霄若論歲寒卓堅骨坐使萬木慚  
丰標離宮管領真遭際南榮歲歲涵蔥翠蒼幹樞

門映日寒素華壁水縈波細攀枝摘葉有所思六  
館三舍應爾師豫章七年人始知不然丹漆將安施  
國學在國子監東大成門 大成殿乾隆二年皆易蓋  
黃瓦乾隆三十年

欽頒禮器犧尊一雷紋壺一子爵一內言卣一康侯鼎  
一盟簋一雷紋觚一名仲簋一素洗一犧首壘一皆  
周時法物陳設殿庭

甬路東西恭勤

聖祖御製 至聖先師孔子贊 康熙二十五年

聖祖御製顏曾思孟四子贊 康熙二十八年

聖祖御製平定朔漠告成碑 康熙四十三年

世宗御製仰丁詣祭 文廟詩碑 雍正六年

世宗御製平定青海告成碑 雍正三年

皇上御製臨雍紀事碑 乾隆四年

御製釋奠詩凡五碑 乾隆五年 九年 十八年 二十一年 二十四年

御製太學古槐詩碑 乾隆三十三年

御製重修 文廟碑 乾隆三十四年

御製平定金川告成碑 乾隆十四年

御製平定準噶爾告成碑并

御製伊犁勒銘 乾隆二十年

御製平定回部告成碑 乾隆二十四年

御製平定兩金川告成碑 乾隆四十二年

石鼓十在大成門內元大德間移置有音訓一通

吳苑石鼓歌辟雍鐘鼓羅俊奇忝臨六館重臯比

廟楹洒掃釋菜畢顧視石鼓環廡墀彭亨菌蠢數

盈十刻畫文字無鼎彝文百二行字五百從甲至

癸完無遺始終記述漁狩事申載策命諸臣詞細

文淺刻堅且好閱三千載光娥義曾經決齧受風  
雨豈用蟠負承鼇螭韋韓二蘇柴大筆助流寶氣  
長赫曦周宣王時史籀作車攻吉口堪肩隨篇章  
排比類吉甫體源質古超相斯誰何小儒恣評駁  
不究根本多然疑先秦西魏駕空說噲點欲使成  
癥疢自來神物多隱見晚出往往千秋垂周官左  
氏佑六籍卯金專門叢詆誅至今首冠甲乙庫儒  
生糠粃如畚菑撫茲鼓質最龐厚瑁琢山骨窮麋  
塵雍城城南久托迹蛟鼉鸞鳳藏環姿辭嚴義密

難諷讀句奇語重誰思維鴻生鉅學茫不識任春  
烟鎖秋風吹縱敲牧火礪牛角却免摹搨傷皮肌  
譬如深山石壑確歲月久遠無成虧文王紐在禹  
追蝕其故豈屬聲音爲自唐迄今始的樂日星雲  
漢光天遠高駝巨艦凡四徒終然暮置文宣祠百  
靈呵護神作合傳萬萬世遐無期方今 天子闡  
絕學玉函金版皆緝披詎惟瑰辭追雅頌直使鐵  
畫侔繇芝 黼帷丹屐多制作慶雲五色紛歲華  
黃支烏弋遠受吏海外來學航於茲峩峩髦士拂

芹茹軌度肅整趨委蛇聖謨文治四洋溢浩蕩匝  
匝無津涯講蒐前制載編牒或按周典揚戈麾威  
靈宣暢讐函夏珣弓彤矢斑陸離從臣材藝敢誇  
詡稽首拜獻成功詩天球琳瑯刻金石潤色鴻業  
攀姚媯炳麟煌煌照六合焯然此事有職司研搜  
故實更參考名爲石鼓良垂宜建康天發石三截  
暨禹岫嶼堪旁推石形似鼓制非鼓徇迹忘本差  
毫釐摩挲彷彿古人意定作闕武岐陽碑

原按石鼓籀文雖與大篆小異然離鐘鼎款識未  
遠其爲三代之物信矣而諸家或疑之馬子卿至  
謂字文周所刻誠倉父之言也

孫承澤云歐陽文忠曰石鼓之文可見者四百六十  
五字潘廸音訓載四百九十四字薛尚功帖載四百  
五十一字今存三百二十五字

考按石鼓文重文不計共字六百二十闕者三百  
六十不全者七十四字全者二百四十字較帝京  
景物畧所載計少十四字

長元按乾隆己巳年摹搨其文存三百十字後大

內得元時搨本存三百五十六字見

御製詩註又按元至元中搨本存三百八十六字

國子監有定武蘭亭并樂毅論明王同祖等丁香花

一詩石刻又老彭觀井石刻元代題名碑三明代題名

碑七十有六在櫺星門內

按定武蘭亭樂毅論係趙文敏臨

查嗣琛襍咏詩陳蹟摩挲亦典型岐陽石鼓晉蘭

亭承平盛事差能記兩座公侯聽五經

一元時國學鏤板有孟四元賦一百十三片孟名宗獻

字友之自號虛靜居士金時魁于鄉于府于省于御

一前故號四元其律賦爲學者法然金史不入文苑之

列惟見于劉京叔歸潛志耳

三等義烈公第在北新橋北鼓手胡同

報恩寺在北居賢坊有明成化二年嚴安禮碑

洪武元年八月大兵定燕都危學士素走報恩寺俯

一身入井寺僧大梓挽出之謂曰國史非公莫知公死

是死國之史也危由是不死翰林待制黃股士皞投

居賢坊井中從人張午負以出曰君小臣而死社稷

耶黃曰齊太史兄弟皆死小官彼何入哉午使家人

環守至日辰會大將軍徐達下令勝國之臣俱輸告身黃給午取告身午出還求勿得亟往視井則黃已死午買棺以歛且營葬焉

查嗣琛禠咏詩國史存亡賴老成小臣只合死忠貞泥多莫食報恩井不及居賢井水清

理親王府在北新橋北王夫人胡同

○爭居寺 崇興庵今無考

循郡王府在方家胡同

雍和官在北新橋東北栢林寺西

世宗憲皇帝潛邸也前爲昭泰門中爲雍和門內爲天王殿中爲雍和宮官後爲永佑殿殿後爲法輪殿西爲戒壇後爲萬福閣東爲永康閣西爲延寧閣後爲綏成殿宮西後爲關帝廟前爲觀音殿

宮之東爲書院門三間入門爲平安居後有堂堂後爲如意室室後正中南向爲書院正室

世宗御書額曰太和齋齋之東其南爲畫舫南向正室曰五福堂齋之西爲海棠院北有長房更後延樓一所西爲斗壇壇東爲佛樓樓前有平臺東爲佛堂

栢林寺在國子監之東元至正七年建今附近  
宮 本朝康熙間修有

聖祖御書萬古栢林四字其殿額皆  
世宗暨

今上御書乾隆間重修

御製碑寺西有

行宮殿中額曰心香室

栢林寺有明夏景金湜包琪潘暉陳政楊煥孟陽司  
馬恂于此分韻賦詩寺僧彙而成冊朱之蕃跋後

履親王府在東角樓寬街

固山誠貝子府在東角樓寬街

五岳觀在五岳觀胡同創自金元明宣德元年重建萬  
歷中修有吏科給事中吳文燦碑

石觀音寺在北居賢坊觀音寺胡同明正統間重建天  
順改名靈藏寺有勅賜碑 本朝乾隆間重修

勅名廣慈寺

萬善寺在北居賢坊羊館胡同明隆慶間重修有禮部  
尚書趙貞吉碑



圓寧寺在羊館胡同係元時舊蹟以僧圓寧得名明嘉靖間重修

右翼礮廠在東直門內北新橋東教場

固山襄敏貝子府在東直門內北小街

鑲黃旗護軍統領署在東直門內金太監胡同

○金太監寺在北居賢坊今無考

福世藥王廟在東直門內街北明萬歷有御製碑

東之北曰東直門元爲崇仁門明永樂十九年立

**補**一等信勇公第在東四牌樓北六條胡同

一等誠勇公第在東四牌樓北六條胡同

二等昭毅伯第在北新橋街白廟前

三等忠勤伯第在國子監成賢街

一等襄寧伯第在殷主腔兒胡同

二等續順公第在安定門街香兒胡同

二等承恩公第在安定門街紅廟前

Blank page with vertical lines for text, containing faint bleed-through from the reverse side.

早稲田大学図書館

011688998249